Bájkkeavijssa NuorttaSállto

Dutki rádjálåvsåj birra

- Oase dassta mij le tjáledum rádjálåvsåj birra Tæksta: Børge Strandskog Divtasvuonas, li garra bágo, subtsastij historikar Marianne Neerland Solheim dajda lagábuv 30 mielos gulldaliddjijda Árranin gå Rádjálåvssåprosjækta diehtotjåhkanimev ásadij åvdep duorastakiehkeda.

Rádjálåvså Divtasvuonan viehkedin gádjot moadda hekka gå Vuonas Svierigij låvssijin nuppát væráltdoaron. Jáhkki tjoahkken 2500-3000 báhtariddje lájdojt Divtasvuonas vádtsin doaroájgen. Maŋep ájgijn låvså rahtjamus gáddalusjáduváj ja ájnegis ulmutja iebdeduvvin. Ienemus oasse rádjálåvsåjs lidjin sáme, ja sáhka lij tjielggasit bájnniduvvam dallusj vuojnos sámij birra, ja dat dárojduhttempolitihkas mij dalloj lij.

Aktan ietjas barggeguojmij, seniorkonsulænnta Oddmund Andersen Árranis ja professor Jens-Ivar Nergård Råmså Universitehtas, ájggu Marianne Neerland Solheim duodastit rádjálåvssåtrafihkav sáme guovlojn ja sierraláhkáj Divtasvuonan. Da gålmmå dutke galggi aj analyserit dav vádnunav rámpos majt sáme låvså ettjin oadtjo doaro mannela. Prosjæktajuogos le juo barggam jages 2007. Marianne Neerland Solheiman le fágalasj åvdåsvásstádus dan gålmmå-jahkásasj prosjevtas, mij boahtte jage hiejteduvvá. Båhtusa girjjen båhti.

Iesj Neerland Solheiman le læhkám åvdåsvásstádus vuorkájn guoskavasj diedojt åhtsåt, madi Oddmund Andersen ja Jens-Ivar Nergård libá duola dagu oabme gåvåjt åhtsåm ja ságastam ja ságájdahttám ulmutjijt gudi rádjálåvssåjähtulagán oassálasstin.

- Vilá gávnnuji báhtariddjelåvså gudi li viesso, ja moadda diehtojuohkke gudi lidjin oasse duosstoapparáhtas svieriga bielen, subtsas Nergård. Sån dættot låvssådoajmma nuorttan ienemusát lij



Fra TV-dokumentaren: Kolbjørn Varmann (NRK)



«Gå báhtariddje Oarjjevuodnaj jåvsådi, de li dagu duonanájmon ja ij aktak danna sijáv jåvså»

sáme doajmma. – Dat diedon geografijas ja årudagájs mierreduváj. Sáme rádjálåvså tjanádin "væráldij" mij juo lij danna ja máhttin ávkástallat værmádagás majt juo lij siján goappátja bielen rájás. Dat le jáhkedahtte akta oajvvesivájs gå nav buoragit manáj, miejnni professor.

Rádjálåvså binná rámpov oadtjun doaro mannela, ja Divtasvuona-låvså lidjin ållu vuolemusán mieren. Vuona politioajválattjajs Svierigin guoddaluvvin báhtariddjijt guodin várijda rádjáguovlojn, gånnå moattes sijás dasi jábmin. Duodden guoddaluvvin sij lidjin báhtariddjijs biktasijt ja ietjá gálvojt suoládam. – Lájtto mij doaro mannela tjuovoj vierttij gal dåbddut rejvadissan muohtuj, gå iesj ja ietjas fámilljajn stuorra vádán moadda jage viessun, miejnni Jens-Ivar Nergård.

Gáldo subtsasti tyska ettjin nagá jali dåssju muhtem mærráj nahkin váksjudit báhtariddjejåhtulagáv Divtasvuonan, sierraláhkáj vuostasj oasen doarrojagijs. Okkupanta dádjadin luonndo, topografija ja man guhkás lij sajij gaskan guovlon lij nav sælldá vaj vargga ålgodin jåhtulagáv rájá badjel.

 Sij aj rádjin fuovav birrusin 100 ålmmåj gæhttjalittjat máhttelis báhtariddjelájdojt Divtasvuonan – Oarjjevuonan, Rudnávuonan ja Spællávuonan. Dán ekspedisjåvnån doarroålmmå guollduj boahttujin, ja moattes vargga hekkav láhppin dálke ja ráhpuga diehti. Divisjåvnnåoajvve Ájluovtan Gestapoj Narvijkan javlaj jus ulmutja ájggun Divtasvuonas báhtarit, de dibddit sijáv! Jus ájggun ietjasav oajttet, de lij dat sijá ássje! subtsas Oddmund Andersen.

Divtasvuonas manáj báhtariddjejåhtulahka Svierigij divna sisnep vuonajs; Slabávuonas, Spællávuonas, Rudnávuonas ja Oarjjevuonas. Duodden lij lassejåhtulahka Hábmeris Måsskåj. Ja jåhtulagá Divtasvuonas lidjin riek låssåda. Ij lim gal nav vuojga guhkás vuonas rijkarádjáj, valla rájás

Vájsáluoktaj, gånnå sámedåjmadagán lij dåbåsj lij vargga 4 mijla. Ja duosstostasjåvnnåj Suorván lij 8 mijla! Manenagi tvska dádjadatjájin dav vijddásasj ja manenagi lassánim jåhtulagáv rájá badjel Divtasvuonas. Diedádusán javllamános jagen 1944 tjuodtju "svenskajåhtulahka le ålov lassánam, sierraláhkáj Divtasvuonan.

Imálasj le gå aj fámilja smáv mánáj vádtsegåhti. Topografalasj dilij milta le jáhkedahtte báhtaribme Svierigij máhttelis sjaddá Låvsåj baktu"...

Tjåhkanibme Árranin hiejteduváj Leif-Erik Michaelsena NRK-filmajn rádjálåvsåj birra Divtasvuonan jages 1980. Michaelsen lij iesj danna. Sån subtsastij filmmaprosjevta duogátja birra, ja vuosádusá mannela oattjoj stuorra gijtov moattet guovlos dat njunnjusjbargo diehti mij dalloj dagáduváj. Filman subtsastij moattes rádjálåvsåjs dåjma birra doaro sinna, ja vuosstálassti dajt guoddalimijt ma sijá vuossti båhtin doaro mannela. Aj legendaralasj Kolbjørn Varmann ságájdahteduvvá TV-dokumentaran.

